

LA QUOTIDIANA

FMR Fundaziun Medias Rumantschas, Via da Masans 2, 7000 Cuirai, 081 544 89 11, redacziun@fmr.ch



Per la pasch

Durant la «Stad da Glion» datti en l'intschess da la claustra da Glion bleras occurrenz, films ed ateliers che tematiseschan la pasch. **Pagina 3**



In bajetg misterius

In dals pli vegls bajetgs en la Val Schons è la «Capalutta» da Pazen. Duvrada pli baud sco uigl è ella oz ina chasa da vacanzas extraordinaria. **Pagina 6**

FMR FUNDAZIUN
MEDIAS
RUMANTSCHAS

südostschweiz

GRISCHUN

In triep da lufs en Lumnezia

En il Grischun datti in nov triep da lufs. Glindesdi suentermezdi ha l'Uffizi da chatscha e pestga confermà ch'ils dus lufs ch'èn gia dapi in onn en Lumnezia hajan survegni almain dus lufs pitschens. Il schinunnà triep dal «Wannaspitz» viva en il territori da las vischnancas da val s. Pieder, Lumnezia e parts da la vischnanca dad Ilanz/Glion. L'Uffizi da chatscha e pestga ha era publictà il rapport quartal d'animals da rapina gronds. Tenor quel è vegnids identifitgads ils davos dus onns 82 differents lufs. Confermà è era ch'i haja dà almain 10 lufs pitschens tar ils differents trieps. Plinavant èn dus urs puspè da viadi en l'Engiadina. (fmr/sb) **Pagina 2**

ENGIADINA

Üna festa per giuven e vegl



Üna dunzaina d'artists haun suno a l'Open Air Chapella.

FOTO JON DUSCHLETTA

Arduond 500 visitaduras e visitaduers haun pudieu giodair düraunt l'ediziun da giubileum da l'Open Air Chapella üna dunzaina d'artists e d'artists regiunels, naziunels ed internaziunels. Uschè haun suno da venderdi fin dumengia «Oak Street», James Gruntz, Marc Amacher, Pink Pedrazzi u «Los Vacíos de Charly» stül palc tal vegl ospiz a Chapella. Las organisaturas e'ls organisatours dal pü vegl open air da la Svizra tiran ün facit positiv. Tenor Jonas Bürkli, responsabel per las medias, saja sto il 40avel Open Air Chapella ün success. Dimena nu sto ünguotta in peis a la 41evla ediziun chi varo lö prossem an. (pl/jd/fmr/an) **Pagina 9**

GRISCHUN CENTRAL

«Siva la plievgia vign igl suglegl»

L'anterioura fiera da Savognin – oz «Scuntrada» – è en termin fix aint igl calender d'occurrenz da Surses durant la stad. Per la «Scuntrada» da chest onn n'è betg ple scu usito angal l'Uniu da mastirants e commers Surses stada responsabla mabagn er las organizaziuns turisticas. Scu tgi Patrick Thurner digl comite d'organizaziun ò detg a la FMR, ins seia sto fitg cuntaint cugl domber d'expositours igl venderde passo. Cun 55 expositours seia chel domber da cumparagler cun las davosas ediziuns dalla «Scuntrada». Cun ena fola visitadras e visitaders è l'occurrenza damai gartageda. La suletta tolca: en temporal fitg ferm – schi ferm scu anc mai siva dall'amprema «Scuntrada» igl onn 1985. (fmr/gns/sab) **Pagina 5**

Musica classica a Mustér...

Cun in concert ei l'Academia internaziunala da stad da clavazin a Mustér vegnida terminada la fin dall'jamna. Ils 42 pianists da 22 naziuns han dau in schatg da lur gronda savida. Duront duas jamnas han els filau vid ils pli davos detagls da lur savida en accumpignament da docents da num e pum. 2024 duessi puspei dar in'academia a Mustér. (fmr/hh) **Pagina 3**



FOTO HANS HUONDER



FOTO SUSI ROTHMUND

... ed a Sedrun rock tochen pop

La sisavla ediziun dil festival ROCKseDrun ei stada in success cumplein. Il venderdis e la sonda ha ei dau concerts e quasi per minga gust musical enzatgei – da rock, pop, jazz e blues entochen rap. La sera romontscha ei in punct fix ell'agenda digl open air gratuit a Sedrun. Giuven e vegl ha cantau culs artists, las canzuns romontschas ein e restan in toc patria. (fmr/sr) **Pagina 4**

«Mieu dachesa sun mias algordanzas.»

Pia Valär reflectescha la patria, l'encreschadetgna, ed insumma, tge è quai – dachasa? – Pagina 16



20032
Servetsch d'abunents e da
distribuziun: tel. 0844 226 226
mail: abo@somedia.ch

9 771424 749004

Per finir in schatg dil talent

Cun concerts en plirs loghens ein las duas jamnas da cuors per pianistas e pianists digl entir mund a Mustér vegnidas terminadas la fin d'jamna. Ils 42 musicists da 22 naziuns han dau in schatg da lur talent.

HANS HUONDER/FMR

Per la secunda ga ha la claustra da Mustér dau suttegg all'Academia internaziunala da stad da clavazin. Las davosas duas jamnas han studentas e students da clavazin da 22 naziuns exercitau sisum la Surselva. Plirs docents – tuts pianists da grond renum internaziunal – han filau vid la savida da lur discipels. L'organisatura dall'academia, *Nina Orotchko* da Turitg, ha purschiu allas participantas ed als participants cundiziuns idealas per sescolar e sepefeziunar. Sper mintgamai tschun uras d'instrucziun persunala ed individuala, han las studentas ed ils students ella vegliadetgna d'entochen 28 onns sunau di per di pliras uras clavazin e singuls han era concertau denteren. Il cuors ei vegnius terminaus la fin d'jamna cun concerts a Falera, Flem e Mustér. Mintga pianista e pianist ha dau in schatg da sia gronda savida all'ala, interpretand ovras dils pli differents cumponists. Denter auter ein era stadas d'udir ovras da *Gion Giusep Derungs*, il cumponist lumnezian che ha saviu festivar miez avrel igl anniversari da 90 onns. L'Academia internaziunala da stad da clavazin duei haver liug la proxima ga en dus onns. Tenor *Nina Orotchko* duei quei esser danovamein en claustra a Mustér. Sco quei ch'ella ha detg enviars la FMR, daventa la finanziaziun dall'academia plaun a plaun problematica pervia dils cuosts carschents. Per las participantas ed ils participants che derivan da biaras tiaras ein ils cuosts en Svizra aults. Per saver separticipar all'academia da clavazin ston ils interessents ademplier differents premissas. Denter auter ston els disponer d'in attest, respectiv in scriber da recumandaziun d'in professor da musica che ha ni che instruescha igl interessent.



42 pianistas e pianists digl entir mund ein separticipai all'Academia internaziunala da stad da clavazin. FOTO HANS HUONDER

La pasch, digna da vegnir festivada

La dumengia vargada ei la «La stad da Glion» vegnida lantschada ella Casa dalla sentupada dalla claustra da Glion. In concert intercultural ha dau il segn da partenza per ina jamna pulpida cun diversas occurrenzas iniziadas per promover la cultura da pasch.

ANDREAS CADONAU/FMR

Sco meditaziun musicala per la pasch ha il dirigent *Fortunat Frölich* annunziu la dumengia vargada siu concert per l'avertura dalla «Stad da Glion». La secunda stad dedicata alla cultura da pasch durant ina jamna cun dabia occurrenzas en ed ordeifer la claustra da Glion. Bia spazi da meditar ha il concert dallas diversas formaziuns entuorn il dirigent buca purschiu agl auditori. Tras memia nunusitadas sferas musicalas ha Fortunat Frölich tgamunau sias formaziuns en in oratori che ha purschiu a l'ureglia presenta ella baselgia claustrala, dabia free cant, in che muenta denton.

Buca sempel co tractar

Pil concret ei la presidenta dil Forum dalla pasch, *Lea Sutter* s'exprimida cuort avon il concert per l'avertura dalla «Stad da Glion.» En siu plaid da beinvegni ha ella tschentau la damonda, sche pasch astgi insumma divertir. «Astg'ins festivar la pasch sche auters mieran enzanu ell'uiara?» Lea Sutter ha getg ch'ella vegni savens dumandada sche quella jamna dedicata

alla pasch seigi ina conferenza, in program cultural, ina scolaziun ni schizun in festival. Cun l'expressiun festival ha la presidenta il forum empau breigia, sco ella ha tradiu en siu plaid da beinvegni. «Igl ei per nus tuts buca sempel co tractar il pitir dall'uiara.» Lea Sutter ha accentuau che la pasch stoppi vegnir promovida a moda preventiva. Ed ella ei dil meini: «La pasch san ins buca festivar avunda.»

La pasch persunala

Plidau all'avertura dalla «Stad da Glion» ha era la nievelegida cussigliera guvernativa, *Carmelia Maissen*, en sia funcziun actuala sco presidenta dalla vischnaunca dad Illanz/Glion. Ella ha regurdau allas differents strategias communalas che circumscrivan ils puncts principals dil svilup communal. «Ina directiva communal che pertucca la pasch exista denton buca.» Carmelia Maissen suppona che quella munconza seigi d'attribuir al fatg che la pasch seigi per nus ina realitad normala. In tema ch'ins surlaschi bugen al Departement federal per fatschentas digl exteriur. Carmelia Maissen ein denton era sedumandada tgei che pasch munti

insumma per mintga singul. «Per biars ei pasch forza ir a messa, per auters forza il sex da pasch suenter ina dispeta denter partenaris.»

Igl inferno ella baselgia claustrala

Daferton ha Fortunat Frölich lantschau ella baselgia claustrala in inferno musical. Ei ha fatg la paretta sco sch'el seigi sespraus d'intonar l'uiara cun eroplans che sederschan dil plantschiu sura, gie schizun il giuvenessendi stetti avon porta. Ina inscenaziun dada da siu agen chor, in chor d'affons tgamunaus da *Rilana Cadruvi* e *Flavia Walder*, da musicists marocans, tuns electronics ed in saxofon tut alla schräga enconschents neu dil freejazz. Fortunat Frölich ha schau explodir denteren quella intercultura aschia ch'els affons dil chor ein gia bunamein dai giud il baun baselgia. Intressanta produczion, igl oratori *Leh Ya Jaré*, magari han ins denton giu il sentiment ch'il dirigent unfreschi las atgnadads e finessas dallas diversas melodias culturalas, sco per exempel la ritmica dalla musica araba, al spitachel. Remarcabel ch'in affonet el publicum ei vegnius da sedurmentar durant quei concert. En scadin cass in segn da pasch.



Il dirigent Fortunat Frölich ha lantschau la dumengia vargada cun siu oratori *Leh Ya Jaré* la secunda «Stad da Glion» iniziada per promover la cultura da pasch. FOTO MARIA TKACHUK

In program variont

La «Stad da Glion» porscha in program pliu cun luvtoris, films, spassegiadas e discuers che tematiseschan divers aspects dalla pasch. Per exempel plidenta la scuntrada da margis, ils 9 d'uost, co prevegnir e sli-giar conflicts denter las instanzas communalas e la populaziun. Ni gievgia, ils 11 d'uost vegn la comunicaziun enteifer interpresas pintgas tematisada. «Rumantsch, in ferm toc Svizra», discutescha vendergis allas 17.00 il cusseglie governativ *Jon Domenic Parolini* cun *Alice Bertogg*, la collaboratura dalla Lia Rumantscha. Quei ei denton mo ina pintga part dil program, dapli e detagls pon ins endriescher via ilanzersommer.ch. (fmr/ac)

DISENTIS OPEN

Ina concorrenza pils giuvens

Quest'jamna vegnan ils parasguladers puspei ad embellir il tschiel sisum la Surselva. Per in'ulteriura ga organischescha l'Uniu Disentis Open ina concorrenza da parasgular, uonn ei quella reservada plitost pils giuvens.

HANS HUONDER/FMR

80 parasguladers e diesch parasguladras separticipeschan alla concorrenza internaziunala da parasgular a Mustér. La gronda part dad els ein Svizzers, vidlunder vegnan plirs da tiaras vischinontas. La dumengia havess in trenament giu liug, mo pervia dallas prognosas dall'aura cun urezis ei vegniu desistiu da quel. Aschia ein las participantas ed ils participants parti il gliendisdis all'emprega concorrenza senza saver trenar. Entochen sonda vegn sgulau mintgadi, lu vegn igl arranschament terminaus. «Las prognosas dall'aura ein fetg bunas, aschia che nus essan optimists da saver organisar il program sco previu», di *Marc Demont*. El ei president dils Surselva Flaigers, l'uniun dils parasguladers dalla Surselva che cooperescha stretgamain cull'Uniu Disentis Open che segna era uonn per l'organisaziun dalla concorrenza.

Meins intensiv

Igl onn vargau ei vegniu arranschau a Mustér il super-final, aschidadir il campinadi mundial da parasgular. Lezza concorrenza cun 125 participantas e participants ha pretendiu dils organisaturs bia dapli lavur ed era in fundament finanziau bia pli grond. «En cumparegliazion culla concorrenza d'uonn ei gliez stau in auter caliber», constatescha *Marc Demont*. Da tut autra tempra ei la concorrenza da quest'jamna era pertuccont sia valetaziun: «Quest'jamna san ils parasguladers buca rimnar puncts per autras concurrenz. Igl ei ni in campinadi svizzer ni in cup mundial, semplamein ina concorrenza pils giuvens che vulan rimnar experientschas per concurrenz pli pretensiusas.» Ils campinadis svizzers han dil reminent giu liug uonn ell'Engiadina. Corrispondentamein ei era il nivel per dabia buca aschia aults sco igl onn vargau. Tenor *Marc Demont* ein biars giuvens ella vegliadetgna da 20 onns dalla partida. La partenza dallas



Marc Demont, president dils Surselva Flaigers. FOTO HANS HUONDER



Quest'jamna embellieschan ils parisols gagls puspei il tschiel sursilvan. FOTO MAD

concurreras ei era uonn mintgamai a Gendusas, l'arrivada a Sax: «Nossa finamira ei da saver organisar tuttas concurrenz cheu ella regiun, tenor las prognosas dall'aura duess quei esser bein pusseivel.»

E l'auter onn?

Dapi onns s'audan las concurrenz da parasgular tiel program da stad sisum la Surselva sco igl amen en baselgia. Sch'ei va tenor ils Surselva Flaigers duei quei era esser aschia igl avegnir. «Alla radunanza generala il mars vargau havein nus decidiu da segidar igl onn 2023 danovamein vid ina concorrenza da parasgular pli gronda», di *Marc Demont*. Schebein ei dat lu era ina tala igl onn vegnent ei tonaton buca clar: «Quei dependa secapescha dall'Uniu Disentis Open ch'ei l'organisatura. Il bia discussiunein nus quei l'jamna da concorrenza digl onn avon.» Quei fuss pia il cass quest'jamna. Per la concorrenza internaziunala d'uonn ein 20 gidonters engaschai pli u meins l'entira jamna. Per in super-final sco igl onn vargau drova ei treis ga dapli gliued ed era per in cup mundial ein las duas uniuns dependentas da dapli gidonters e gidonters.